



*Rabu, 02 Oktober 2024*

**Ogen : Matius 5: 38-42**



**Ula Erbalas**



**S**ekalok filsuf Perancis Jacques Derrida nuriken kerna perbedan ajaren Jahudi ras Kristen aminna pe duana terkait erat secara historis ras geografis. Lit telu si perlu iperdiateken:

1. Jesus ngenehen maka hubungan Tuhan ras manusia eme hubungan langsung. La perlu kelang-kelang bagi pemuka agama bagi imam-imam, guru-guru taurat.
2. Jesus ngidah keutaman lebih penting asangken keadilan. Janah si utama e me keleng ate nandangi kerina makhluk. Alu telkas ikataken Jesus kerna bahaya pandangan sindekah e me mata gancih mata, ipen gancih ipen. Petembil kal pandangan si ndekah enda ras pengajaren Jesus. Nina Jesus ola erbalas adi lit kalak si erbahan segat atendu. Perlu lit pengalemi salah man kalak si segat ateta, janah ialemi kalak ka min salah si ibahan kita. Sabap pengampunen e la lit batasna. Ipetangkas Jesus pe tole maka kita arus erbahan si mehuli nandangi kalak si ersegat ate banta, masu-masu kalak si numpahi kita ras ertoto guna kiniulin kalak si nakiti kita. Sabap adi erbalas, segat ate labo banci masap adi alu segat ate tapi arus alu keleng ate. Kita arus erlarar guna melampau kemarahan dengan cinta dan melampau kejahatan dengan kebaikan.
3. Jesus ngenehen pemere labo guna imomoken ku jelma si nterem. Ertoto pe labo arus icidahken ku kalak sideban. Magati enda jadi sada tanda kemunafiken/pekulah-kulah ngenca. Pemere man kalak si deban ras ertoto arus ilakoken secara rahasia sabap e kin sada ketulusan hati.

Jesus makeken sada perumpaman keleng ate Tuhan man manusia desken udan si nusur man kerina manusia. Seri pengidahna kalak bayak ras kalak musil, kalak bujur ras kalak perdosa. Adi Jesus ngatakensa, ula erbalas, engkai maka kita erbalas man temanta? La lah secara la sadar kita nggo melebesa e janah ajaren Jesus e tading arah pudi? Mari kita rukur ras merenung!